



帥惟審先生集序

慈谿胡亦堂二齋譔

余於臨川前達得帥惟審先生之所爲集集旣定而序之  
先生始由進士歷仕官南北部出爲思南太守地當南徼  
已類寘棄復又左遷鄴丞後以獻文得賜環部署旋引病  
自免于其作詩每以仕位坎坷自傷蹇拙考其大槩抑亦  
其人直道自守不合儕偶故至中於銓法奔走險巇有大  
不得志於中而言之者昔屈子以忠貞見擯于江濱憤讒  
人之高張疾主聽之不聰乃著爲離騷其文遠引曲擬以  
寄其志後世讀之不勝其悱惻焉然湘君雲中之辭孺慕  
其君反覆沈沔而不釋所謂怨而不怒故嘗爲論之曰屈  
子之騷可以繼三百篇者也先生當明中盛之時幸無屈



子之遇徒以學成網羅不得以所能親幸于上有所感慨  
雖仕外官嘗繕西京賦平夏頌以進其文博大而譽諤精  
銳而淵堅有超越前人之槩設使其時如漢用長卿之故  
事處之卽不必得大政而雅列侍從優游一官殫其著作  
可以無憾然賦頌旣上宣付史館一時文采所表見亦不  
可謂不榮矣乃其所著爲詩取材宏而用物富音律老健  
皆可玩誦擬古則逼文選五言則在中唐於其諸體尤復  
爲長其作元日詩自以君門日遠雖身在江湖而心懸魏  
闕忠愛之意油然而宦遊所至楚沅貴竹天中於越之間  
莫不寄其篇章蕭瑟幽貞之氣敷于言下後之人試置身  
而處所爲流連景會發舒憤懣至今猶得髣髴其人有所  
興起士君子不得大遇于時而徒托于詩以自傳其能自

已也夫



帥惟審先生集

慈谿胡亦堂二齋選輯

文

進呈二京賦疏

原任南京刑部廣東清吏司郎中今回籍養病臣帥機謹  
 奏為躬際文明無由效忠謹獻二京賦以隆聖祚事臣聞  
 宣人心之精不可無言鳴國家之盛莫大乎賦在昔東西  
 兩漢關洛相去止八百里漢祚中失光武再造前後已分  
 然班固張衡猶各為二賦以侈其事趙宋偏安都汴益界  
 界不足彌數當時儒臣周邦彥尚作汴京賦以獻臣伏觀  
 我國家膺受曆數包合寰宇南北兩京並建延袤至二千  
 三百里且成祖遷都于治安全盛之世又非光武可同方



將配天地之無疆同兩曜之貞明誠宜有賦以詠歌盛美而昭代詞臣墨客其人已往者彬彬稱不乏人而二賦尚缺豈以班張制作難以復加慎讓之過矣乎如臣蓬衡蕞品樗散陋姿旣非班固身爲侍從又無左思秘書可求人地孤寒見聞淺狹如螢爝之微曷足以增日月之光棖楠之材豈可以勝棟梁之任敢以諸詞臣所謙遜者不知而作哉獨念臣束髮至今癖書蠹簡殺青置硯而竟窘蠹泥沙秃落英耀望日常蔽於戴盆占星未遇夫賜環先是萬曆壬辰之冬臣左遷河南彰德府同知冒昧獻平西夏頌一篇荷蒙皇上命將臣頌錄送史館臣捧讀綸褒旣稽首祝謝而又幸生明盛之世遇好文之主俾疏賤微遠之臣尚得伸其末技益感激思奮期作賦以鋪張大業而刑名

填委無暇日以覽觀載籍故業盡廢益忽忽失志不樂舊患痰火大作癩眩時動於甲午歲正月內托堂官徐元太轉疏移疾旣得俞旨歸而閉關調理數月風疾稍愈如有所得書之於紙蓋匝月而賦成焉雖未足窺班張左思之藩籬然不敢徒模倣其鋪叙之事類掇襲其奇難之字句于城郭宮室古迹民風亦不敢蔓衍牽綴而不切臣誠不佞然不勝雞肋之惜竊欸欸欲效其芹曝之忱謹昧死復獻闕下自知不足以揄揚萬一亦猶愈於已也惟陛下恕其狂謬而垂覽焉臣又竊聞京師者天下之根本也人君一心又根本之根本也今東南民力竭矣而燕京烽火時警亦汔未康臣願我皇上體乾行健純心用賢節用愛人以保國家之元氣使東南財賦之地豪強不得以漁食小



民強兵擇將以振國家之神氣使西北鎖鑰之樞盜賊不  
得以流伺中國重文行而擯斥鑽刺省議論而責覈實功  
率僞之極矯以忠質悖大之體奮以明作則宗社億萬年  
之休不徒恃乎形勢之險固矣草野微臣旣已獻其雕蟲  
之技復敢效其狂瞽之忱臣無任惶恐隕越待罪之至爲  
此今差義男帥鞏抱齋南京北京賦二篇隨本上進以聞  
平西夏頌

河南彰德府同知臣帥機謹奏爲仰戴天威瀝情獻頌事  
臣聞江海汪洋潢汗有朝宗之願厦屋輪奐燕雀效懼躍  
之鳴伏惟陛下聰明首物神武亨屯西賊蕩平昆駝息  
茲者凱旋獻俘告廟宣捷臣跼伏下寮待罪河朔不獲親  
覩其盛徒想見神人之和樂佳氣之氤氳不勝欣喜懽愛

之情暇日謹撰平西夏頌一篇用以宣導性靈攄發志意  
竊惟屠肆之混品豈可羞於王公液備之散材未可採於  
廊廟臣疵賤微遠醜言蕪音豈可瀆九重之清覽然臣又  
聞之野人食芹而美尚思以獻於天子昔唐柳宗元播遷  
柳州獻平淮雅臣才學不及柳宗元而癖書遷斥迹偶  
類之故敢不揣進越冒昧獻闕下亦臣之極思篤悃也惟  
陛下其涵察焉臣無任惶恐待罪之至爲此今差義男帥  
安抱齋頌詞一篇隨本上進以聞

臣聞乾坤覆載不能無憾於黍民日月照臨不能摘光於  
曲穴是以天生五材金行配土谷之用時分四序秋殺成  
生育之功扼共工於不周誠非得已擒蚩尤於涿鹿豈爲  
不仁我太祖高皇帝功德超邈刻聖重光累洽皇上休養



生息雖間有竊發不寧然未有亂臣賊子敢跋扈不軌公然逆亂者也廼賊首哮承恩劉東暘者西羌餘孽違光蓬艾之間廝役細人假氣陶鑪之內或世膺武爵肉飽而虎狼愈暴或日耗太倉豢豐而犬豕俱獰異類不祥卽安祿山之故事陰謀潛畜慕趙元昊之所爲君父恩輕梟獍情毒結黨而戕殺主將乘虛而竊據堅城宗藩危若綴旒邊民困於陷穽以彼惡少無賴直若螻蟻之微惟恃結黨爲援遂成狼狽之勢聖天子赫然發憤命將出師或簡方叔壯猶或嘉終軍悅慨輔臣焦勞於籌畫樞密拮据以經營變雖起於不虞謀多稟於神算始焉緩攻徐戰與全生靈彼乃僞降怙終包藏奸宄遂罷招安之議一意摧陷之圖燬南門而烏焚其巢決河水而鼉產於竈進退無計喘息

苟延猶且逞貪橫以虐居民傾財賄以求外援秋高渡河肆行寇掠可謂危矣幸賴宗廟神靈陛下明聖賈勇而遇大敵靡有貳心出奇以挫強鋒遂收三捷人馬多斃於雲火輜重委棄於蘭山羣旣遂遁歸巢賊益孤立無與從散約解遂同土崩魚爛之形食盡志窮有如霧滅煙銷之速是知物極則反短尾必斷於瀟湘惡積餘殃大腹竟流於牀席未半載而奇功已奏誠今古所稀見者也茲者獻俘告廟飲至策勳東隅西榆果收漢廷之效南征北怨何異湯后之師陛下御明堂受朝賀蓋將以答昊穹之簡貺慰祖宗之明靈豈徒以誇詡衆庶警動四裔而已哉小臣糜祿河朔誠不勝雀躍之情乃作頌曰於赫我明御天應曆兆朕振古靈苗水德百夏貞觀混沌重關再造人倫一匡



皇極功逾黃虞慶流千億我皇紹統基命勿冲冠疑騰質  
旭卉清裏凝旒司契卷領承風修省天變子惠困窮四海  
爲家塵莫掩空哮劉背德謀逆鳴張豺牙密厲獬犬恣狂  
戕我撫臣據我朔方兵家之律應勝義王匪我挑之彼實  
畔常皇赫斯怒聲罪整旅攢聚星鋌續紛月羽雲飛霆擊  
時勤犒拊賞無留庫罰亦授斧士卒慶威罔憚暑雨文武  
之道在丁其時創業尚武承平遂衰我皇繼體力振中微  
元戎大吏如熊如羆蘊若鞞弩動若發機小勝不矜小衄  
益壯焚其南門賊膽已喪灌城數板乞降情誑乘勝擣虛  
莫敢支抗丹浦無戰阪泉自蕩賊猶窺伺秋高渡河白沙  
如月兩岸嗟峨王師再捷斬首數多碎彼輶輻驅其橐駝  
成宣以後此功爲嘉朔方赤子戴我恩深爲賊勢劫卒乃

帥惟審先生集

慈谿胡亦堂二齋選輯

擬古

李都尉陵別友

束髮從軍旅矢志墮泥塗良友復當乖孤踪恨何如黃塵  
暗天地塞草常彫枯出門皆各異幽懷孰與舒與子同宣  
力榮辱何頓殊人理旣乖絕空存六尺軀白日沙場沒執  
手蹙躊躇蓬蒿思足音因風寄尺書

蘇屬國武奉使

日月會龍旄霜寒殺氣凝起視夜何其朔風振前庭征夫  
懷遠路促駕不遑寧良朋相追餞樽酒爲我傾驅車指沙  
漠回首望漢京結髮忽分散兄弟闊音形王事方靡盬豈



得顧私情迢迢陰山道蕭蕭塞馬鳴薄馳一介使負重如  
復冰存亡焉可必惟當竭忠貞

魏太子丕遊宴

前池美遊遨宴樂取所需芙蓉香發越嘉木亦扶疎清風  
滿園院明月照華裾竹水交葱翠膳飲出中厨絲肉相遞  
奏震澹仰遊魚張筵卜大烹密席刻文儒雖在廟廊上何  
異鄒魯濱旨酒娛心意周行爲我陳

陳思王植贈友

君王弘收攬俊髦何並作伊余忝懿親志不忘葵藿眷我  
二三子論交同蕙若豈慕神仙遊專爲意氣諾文墨相切  
磋今古日商確歲月不我與榮華易彫落無庸刻藩侯虛  
糜祿與爵白首事雕蟲將爲子雲薄送子出河梁孤懷益

寂寞努力事聖主王功冀恢廓親交義所敦因之申九約

劉文學楨感遇

合抱產深山必由匠石採元凱升虞廷霸功亦自隗君王  
好賢才疇咨熙帝載托身在文墨謬持螯測海侍宴設華  
茵眄睐有光彩中山酒盈樽水陸陳菹醢自慚蕭艾質何  
以儷蘭茝感恩實難名報德寸衷在

王侍中粲懷德

東都昔喪亂我生逢不辰四海如鼎沸王路多荆榛側足  
無所騁竄身荆楚濱上宰奉天伐秉鉞靜氛塵眷我羈旅  
賤戴罪刻侍臣公子推明愛寵遇日以新身無百里智拔  
擢與之倫譬彼涸轍鮒江海復縱鱗敝箒悞見變魚目慚  
混珍惟有天保詩可以答主人



稽中散康言志

澤雉畜樊中得食神亦疲文犧非不美入廟尤足悲余生  
不諧俗本慕煙霞姿尚志養生理老莊以爲師冲靜洽真  
氣琴書聊自怡虞夏忽焉沒忼慨將安歸擾擾人世事無  
乃自縈維遐棲養營魄委運和天倪

阮步兵詠懷

微陽促晷運秋風日以高蟋蟀鳴不止鴻雁聲嗷嗷人生  
若朝露觸緒心愈勞公孫泣拜相龔子自剪髮近刑爲參  
辱近名禍所招嗟嗟世上士何用自逍遙

潘黃門岳述哀

結懽期白首誰意中路析倏忽宿草生荏苒時序易鸞鏡  
委流塵蘭房無復迹明月照空機淒風吹四壁德音弗可  
忘服改情無極旣慚琴孟達亦愧莊缶擊平生慕達者沉  
憂終莫釋我無谷風乖爾類蜉蝣翼悠然雲雨散宵爾幽  
明隔百年終同歸哀章宣鬱悒

陸平原機羈宦

少歲承世胄祖考名遠揚故國自忝離壠首委榛荒聖朝  
隆使過服承觀國光恩紀日以新拔擢輔元良我行旣永  
久觸緒興慨慷嵩邛何峻極洛水亦泱泱信美非吾土安  
得還舊疆樊雉思林藪越鳥指南翔無能刻輔導寵過懼  
生殃嘉遯慚箕頰歸留慕子房惜無翻飛翼引領情內傷

左記室思詠史

士有抱恢奇不遇終草澤何世無腰裏必待九臯識紀生  
空殞身蕭曾獨開國千秋取相位子雲老執戟金張亦何



盛七葉貂璫赫李陵一敗軍千載心莫白用捨在當塗行  
止非人力綺皓甘遺榮無譽亦無戚

張黃門恊苦雨

十雨彌嘉祥霖潦爲患害飄忽風以陰掩藹雲如帶曠曠  
兩曜昏黯黯九秋邁平陸可行舟堂坳堪負芥墻垣自傾  
頽甕牖彌湫隘生民慮爲魚黍稷安能介大化能無憾憂  
心靡所屆

劉大尉琨傷亂

皇晉邁式微生民痛無主厲階起妖牝延敵似養虎神州  
遂陸沉京邑無遺堵伊余忝國恩志欲靖宿耻少康得賢  
臣祀夏興一旅申胥泣秦庭感義竟復楚緬懷古人風指  
据恐無補提劍指關洛基甸爲禾黍戎馬生郊原道路多  
險阻有恨未能雪何以報君父中夜起徘徊忼慨氣莫吐  
否泰有循環時危志豈沮努力殲寇讐甘心膏莽土

盧郎中諶感交

砥柱障中流歲寒見松柏時亂正縱橫中土無完璧君子  
抱經綸志欲扶難厄慷慨動天地忠信懷蠻貊伊余生不  
辰俯仰遭毒螫孤苦無所依謬蒙賢達識申以婚姻好明  
義敦莫逆自愧鶩蹇姿何以參衡軛禍患及君父忍死徒  
啣恤托交結同仇勉力期無逸歧望未云遠官守嘆阻隔  
佳詩難報章聊以陳感激

郭弘農璞游仙

汾陽見四子空峒訪廣成玄珠一探討身外皆浮榮衆人  
空擾擾誰識重與輕西嶽明星女東海安期生我願往從



之飄飄乘雲軒還精飲元氣餐和採芝英五難既解脫三  
寶自克盈身無尺土封終古游太清

許徵君詢自叙

鵬鷁各有適性得無大小魯人奏九韶祇足驚海鳥去矣  
從所好真樂豈矜矯托身建德鄉樛材冀可保一遺弱喪  
情曠然昏夢曉緬懷從清風庶將契幽渺

陶徵士潛田居

寄形天地間瞬息無寧柯及身猶強健力耕期得禾三事  
既就緒登穫慶時和民中雖窳苦庶無蹈風波百畝半種  
秫釀酒旨且多得飲宜盡醉不復顧其他委蛇步原隰  
履陟巖阿形神俱無累爲樂當如何

謝臨川靈運遊山

拙宦遠世網雅好在山水欣此春日遲嘉晨益爲美逶迤  
逕百折迢遞磴屢徙叢林香氛氲曲竇石潄泚陽崖宣明  
麗陰洞闕奇詭萬壑爭闐玖千巖競炫綺多愛景非一矚  
玩情無已俯澗濯塵纓披莽採芳芷天造假人功畢遊竟  
忘始孔子嘆逝川莊叟齊物理凝和貴息機攝躁在知止  
誓將盡天年何徒慕金紫

顏特進延年侍宴

樂推新景運祥習時豫遊離宮駐警蹕別館瞰伏流卿雲  
承翠蓋綵吹發名謳白魚舟前躍紫氣仗外浮鳧雁流煙  
海林木長崇丘風光明遠野景物麗芳洲張筵刻侍從飲  
至羅公侯百禮降祥壤人樂鳴鍾球臣懽一日澤王降三  
接優謬通金閨籍獲與俊髦備滄海湛露清貫近宸旒



祝頌希周雅萬年荷天休

謝法曹惠連叙別

薄遊僞徒旅飲餞傾芳酌深眷靡解釋夷猶聊遷就藉此  
汗漫容兼攬山川秀因念風景殊還望心孔疚  
心疚亦何爲迨遍兩相思哲兄憐我弱道義兼友師夢想  
南樓景惆悵西池滄素無四方志豈堪千里睽  
睽別旣不堪羈旅復艱苦澹澹風波邈霏霏雨雪阻積素  
惑平蕪屯雲迷極浦淒淒遊子懷寂寂誰晤語  
晤語豈無它意氣少諧和良會三秋隔離愁一日多綺琴  
且停奏白雪誰唱歌往來復無幾時序忽蹉跎  
蹉跎至海濱光風已轉蕙柳暗鳥相依蒲青魚其戲淑景  
抽奇思新篇多佳麗願言理楫歸與君共賞會

王徵君微養疾

金石不能固每患外物侵以斯好至道臥病守青岑觀變  
窮大易和神撫素琴蕭瑟洞庭秋荒煙散寒林柴門張雀  
網空谷稀足音枯寂有真趣悠然見道心丹砂庶可就投  
璧惜寸陰庶將免天伐豈以易華簪

袁太尉淑從駕

省方慕虞巡懷柔法時邁肅駕由明祀逃覽因無外馳道  
風塵靜瑞靄通帛旆騰驥駕玉虬動地發鏡吹冠蓋紛景  
從虎賁陳羽衛恊氣鼓泳翔神光燭眴昧德水汎榮光山  
靈呼萬歲仰眎察精禋俯諦知民害下車問牧童止輦禮  
耆艾宸翰跨橫汾天藻逾過旆幸當聖主御無煩祈招戒  
動止合陰陽詩書輝紀載時作岡陵朋坐觀海宇泰



謝光祿莊郊遊

劇市苦塵氛吏道何拘迫  
選隙出郊原驚望祛煩  
感秋風吹羅衣灑然若有適  
尋雲眺連岡拾蕙遊素陌  
猿鶴響哀音喬松挺惠色  
行國聊寫憂謀野信多獲  
將返沮溺耕擾擾竟何益

鮑參軍昭戎行

遠道知良馬寒風見勁條  
秋高黃塵起馳走何輕僿  
天王奮赫怒命將出嫖  
姚材官皆超距騎士能射鵬  
揮戈臨瀚海雄勇誰我驕  
張軍宿草野志非保領  
要雍門恥越甲一死令名高

古風

送田孝廉歸忠州

君不見西蜀開國自蠶叢  
長卿蔚爲詞賦宗文采風流代  
不乏淵雲接踵唐梓潼  
田生倣儻瑚璉器儼然持幣來相  
從下士聞道恒大笑落穆誰肯顧  
蒿蓬方欣聚首慰離索  
忽漫理櫂乘秋風我聞三峽地形  
天下險巫山縹緲多奇  
峰瞿塘灑瀨瀨杳無地清江碧石  
參虬龍忠州實當楚蜀衝  
青山淥水秀氣鍾田生結屋依名  
勝徘徊猿鶴共雲松收攬江山資  
絲筆羽翼騷雅陋雕蟲凌雲賦奏  
甘泉官六翮養就摩層穹異時制  
作鳴盛世寥寥楊馬繼遺蹤古來  
神物終當合不須分袂限西東

過磁州留別劉參知歌

太行繚繞漳水迴豫州北境接上台  
美人銜命坐鈴閣澄清  
清趙魏真威懷傳經旣已化殊俗  
重地猶借寇君來曰余



白首困行役，偶影抱膝思。悠哉寒衾夜，投蓬塊宿匹馬晨。  
驅冰雪，體自憐。冷落誰造熱，使君何意起寒灰。先令候吏  
傳消息，欣然下榻畧形骸。青山盡擁觀察署，烏鵲疑棲御  
史臺。永夜銜盃班尹聚，遷坐論文流水諧。敢云蔡邕倒玉  
粲，實同陶侃禮方回。舉世競能高下手，而君明義孰與儕。  
半天朱霞同輝彩，西山爽氣絕塵埃。昔附毫端致千里，今  
蒙淑顧重駑駘。趙咨過界無能役，李膺得御豈曝鰓。醉來  
不覺狂言發，知已能令鬱抱開。睥睨人世俱如夢，肯使文  
章千古埋留戀。不堪期會迫雲山，分阻重低。何當歸途  
及春更作平原飲，與君長歌迥眺共當鄴下才。

送劉銓部之任南刑

君不見金陵佳麗，瀾京洛江聲。山色環雉郭，騷人僊客在  
其間。吏隱風流忘濩落，昔余辭闕戀江東。十載登臨興不  
窮，吳人業已甘飲水。謝公道路憶山中，劉侯磊砢懷直道。  
忤權不肯睨華好，歸來得失等條風。習靜著書將終老，中  
興士品定行藏。遲君丹轂倍輝光，詔起西來掄建業。故將  
奇蔚助文章，夢遶舊遊羨君往。後先芳署擅吟賞，漫道青  
蓮賦鳳臺。秀句應與爭雄長，霜寒水落舉離觴。願爲鴻鵠  
雙飛翔，月映澄江懸匹練。沙明北渚戲鴛鴦，使君治行曾  
第一。寧分隆窳輕法律，公餘眺古玩雲霞。攝山牛首堪載  
筆，松附蘭交固不渝。回首風潮恨別初，賜還金馬已在卽。  
數寄新篇慰索居。

與趙州守

趙生倜儻殊不偶，落落芳名在人口。白雪陽春和者稀，神



自來羞繞指疎狂世解嫉娥眉問君今年四十五二十年  
前已解組寧惟鄧禹將笑人那似顏郎能動主蠅污域射  
誠傾側錮人聖世徒懷璧登朝甫及賈生年習隱方驚潘  
鬢白浮雲世態曷欣悲尊生蕩累托支離鵠嶺鸞岡時窺  
景江花籬菊對題詩繫余亦緣同病者荒官淪躓居人下  
永夕頻蒙班尹懽高秋輒動呂安駕與君歌一曲君可無  
煩惱運蹇明時擯敬通時逢好官憶玄保富貴磨滅竟何  
爲朱輪焉得比玄草君壘有酒架有書清風明月無時無  
何不招引帥生者嶽嘔歷落長相娛

登故相夏公寶澤樓感慨之作

君不見信州形勝雄江藩雉堞曾繇庶且繁青岑碧障虹

橋臥連舸結艦凌風煙夏公昔日富才智遇主適值風雲  
會六垣獻納超華軒十載中書掌帝制携手慈陵真股肱  
方舟容與魚藻情賦就輒稱才宰相酒酣燕樂或不名自  
言遭遇千載奇自慶此身入蓬池舟遊日月符夙契夜呼  
魏公愜前期貴臣傷罷古來忌金章玉冊翻爲累承恩賜  
她在朝昏大行孟門猶坦地富貴成來殊壯偉先後人皆  
昧知止魏其傲取武安怒博陸禍自高平始當時擬上西  
羗圖豈料還嬰東市誅接憤瞋目固爲慘此身爲國亦何  
辜莊皇追憫加贈諡遺孤不及子堅祀人倫業已墮貪夸  
身處未能成節義雲沉院宇晝常關滿地落花水潺潺碑  
篆龍章多漉漫閣藏御札半朱殷當年寶幙紅蓮漪今朝  
鳥跡蒼苔滋咄嗟榮華如一夢不但人間有分宜功成身



退堪自保牽驢聞鶴苦不早散金碎穀藐清風寄語權門  
須學道

奉酬龍伯貞郡丞雜贈作

君不見洞庭波濶與天平武陵洞杳雲物清秀氣徃徃在  
人傑伯貞家世何崢嶸橋梓由來自師友風流亦復成科  
名阮瑀徐摛俱有子中郎太令並揚聲伏滔自詫父如此  
僧彌亦復難爲兄東溟海氣叅涼燠風入明窓動華燭足  
欣山海宴城隅復如莊惠遊濠濮一言投分縞紵申鳧園  
賞會從清辰長卿謫來自僊籍相視莫逆余三人拍肩把  
袖殊相似世上知音得如此摛辭共許馥金蘭學道相將  
窮玉筭良夜清言及曙鍾舉酒持螯興未窮當隨黃鵠遊  
四海何如老驥鹽車禿縮嘶寒風

伐木圖歌爲譚比部賦

君不見禽鳥咿嚶慕儔侶人生焉能無人徒鮑佐遍逢誠  
鄙競朱叔絕交亦專愚譚先生真丈夫美髯炯目容魁梧  
得第爲郎垂白首憂時直疏叩青蒲厭苦俗流意高遠性  
不好酒將何如曲逕頗餘二仲跡雅歌妍談良不虛江上  
風清足唱和嶺頭梅發相扶疏義取周雅屬圖繪嚶聲幽  
谷恍堂隅余故人寰寡交者偶君比舍同朝曩伐木堂中  
亦諸友趨風許許無喧呼睥睨人世總如鶩班荆樹棘藐  
若無富貴無聞空鉅麗孰若與君有酒滑我無當酷

五言古

秋懷詩

四序含陰陽金爲陰之精仲秋氣始納草木初天刑中園



有榆柳颯颯振衰聲  
絡繹昔何在今茲  
達旦鳴淒涼遊子  
淚慘澹空閨情  
羈臥愁夜永  
起坐自熒熒

二

秋氣日慘惻  
秋懷不能寐  
東海有真人  
垠堦寂無事  
千歲方嬰孩  
浮榮焉足計  
媿我凡俗姿  
鵬鷖固不類  
逝景弗可追  
衰容豈還穉  
露濃鶴早警  
風高雁猶避  
胡爲夸譽名  
役自憔悴  
緬懷張邴風  
聊用宣吾意

秋日同齊王孫重遊牛首

涉秋常苦悲  
拘攣如屈蠖  
靜癖能無動  
縣解當行樂  
佛窟再登臨  
皇宗共扳約  
振衣躡丹梯  
蹠足迴巖岬  
眺迥情逾棕  
望遠思彌博  
岩石掛扶留  
文姝敞芝閣  
境寂聞梵鍾  
林疎棲暮雀  
涖涖起松濤  
縱縱語鈴鐸  
雲霞生棟間  
天雞拊寥廓  
曾霄未損高  
宇下如趨壑  
宋郊盛聲容  
蕭遊豐述作  
梵刹何依然  
人事已銷鑠  
繫余秉微尚  
河沙甘濩落  
塵纓時苦羈  
蠟屐猶堪着  
憂來年恐傷  
定極老須却  
且願依淨名  
終然謝禪縛

胡孟駿見訪

司馬窮工賦  
虞卿愁著書  
嗟余守經訓  
宦拙倦乘車  
有客豫章彦  
彩筆干斗墟  
條風忽來至  
華年惜居諸  
雄談自超忽  
析理相扶疎  
永日難盡歡  
一言傾蓋初  
寥寥陶公後  
清芬沓無餘  
振興賴吾黨  
江山能發舒  
與君申久約  
新知時起予

送楊儀部歸嘉州

直道固難容  
盛年遽投簪  
一往岷峨思  
萬里何蕭森  
道傍



猶嘆惜賓御共沾襟而我蘭膏契交誼良已深昔如蚩與  
駟今者辰與參世事同雨散風波常陸沉願君愛容髮無  
令弱思侵著書以自顯古來多素心

咏史

夫差易勾踐吳祀遂忽諸項羽輕高祖其術固已疎苻堅  
矜百萬一敗爲丘墟盛氣小天下衰不支一夫禍患生所  
忽傲戒乃訐謨

初發都津頭別稚兒廷鈺廷鎮

理權發舊京鳴蟬滿江樹溽暑雖未收招搖初改度舊路  
復登程孤遊旣已屢腸斷發棹歌目送稚子去稚子曰已  
長一官尚如故追往更傷今僕僕如織路離別倍黯然媿  
讀歸來賦

泊舟晚步

薰風滯行旅艤舟苦跼踖散步歷郊原灑然塵慮釋暮煙  
散遠峰蒼雲映浮白殘暑一以收秋氣何冲寂涖涖水分  
流翩翩鳥棲夕隙地種蔬麻禾黍被阡陌野老能逢迎牧  
童時弄笛依然故鄉景何異滄洲適嗟彼朝市中束帶誠  
徽纆

夕泛驚險

信矣汗漫遊蕭辰愁日暮決漭水天連稀微夕陽樹渺渺  
斷人蹤離離雁鴻度微身路不測安危若朝露亮乏昔賢  
分涉險多恇思拙宦棄無因漂零惟道路河淮窮履歷江  
漢逼沿溯旣彈隋侯珠真類屈老瓠閔默含羈情歸心將  
誰訴



過洞庭

昔聞洞庭勝薄遊得臨睨巨浸包全楚駭浪浮元氣浩漉  
天淵平荒忽慘舒異日月經往來烏鳶怯實墜震澤亦汗  
沱彭蠡安能儷宦拙窮江湖老至禦魑魅諒乏蹈水信徒  
興歷覽思帝子望夷猶懷鄉正迢遞

秋日湧興

搖落本蕭辰昔賢曾悲此我亦坎壈人對之何獨喜孱軀  
苦赫炎欣此煩鬱洗草木漸凋零於人自適體撫化宣微  
思跌宕惟文史眷茲冲虛節惜哉時運駛

清浪館感眺

天王負黼屨考績肅王度緹組集京師玉帛陳五輅繫余  
邊鄙臣僻陋輸寶賦不得附諸侯亦自趨朝著孟冬初發

程巖險無安步驅車黔楚交山谿鬱叅互始得出幽谷倏  
如披雲霧明月湛金波飛泉擁瀑布漸觀中華風復傍故  
鄉路感此重懷歸祇畏簡書故

銅雀臺

銅雀臺何峻蘭橈四面披武皇鞍馬隙麗種恒相隨平生  
志何壯垂絕黯無依晡奠咽歌吹松月冷泉扉青娥未遽  
老故宮已黍離玉匣果何在鳧雁詎能飛花榮春不待烏  
死鳴自悲惟餘西陵下千載愴落暉

久陰多懷

楚客悲回風衛臣憂北門一官成漂泊曠曠感彌繁陽微  
方急節雪薄不勝温歲晏多沴景結念在丘園樊雉日思  
澤寂寞誰與言



除夕作

狗祿返荒郡在苒歲忽道睠茲遐僻地景候類中州霏雪  
動羣吠愁雲蔽高丘蚤春欲改歲陰風尚颼颼公車疲往  
復吏道日拘囚一爲縲冕累未若役車休尺波何迅逝隙  
駟不我留聊醉一杯酒無懷蟋蟀憂

寄黃銓部克念

宋毫總地靈伊人何俊偉弱冠負修能騰鸞積風起內地  
試鳴絃籍甚佐端揆康伯舉孝廉巨源甄臧否身非南州  
賢謬辱西河禮豈伊乏新知眷言固終始平生不諧俗一  
麾乃邊鄙僻陋少同人幽宵愁山鬼綿力固不勝孤蹤誰  
見倚敢云投枳棘實自羈斗米故人惟山公曲蓬藉原臬  
極目何悠悠因風寄君子

仲夏涼雨聊得散帙

夏涼旣當惜國小務初理雖微剽紛能竊慕清淨旨嚚習  
事耕農隙際稽文史冷風時入戶靈雨夕流駛滑滑鳴水  
禽陰陰盛桃李焚香寂道心披衣適孱體豈無謝公趣所  
乏佳山水良書一流目悠然塵欲洗行簡自宜民務學益  
明仕誰謂儒法殊俗吏誠堪鄙

客送文苑英華喜賦

曰余羈守符詩書未嘗廢李唐後且繁路遠遂莫致僻陋  
何由購遐思發夢寐客從故鄉來惠我帙盈笥大冊儼舟  
車牙籤貯錦製章甫豈空資巖崖忽生麗如燠澍甘霖若  
饑獲糗糈繪能感真龍劍已遺烈士我則皇甫淫君乃鍾  
期契政暇稍追尋聊足緩歸志



郡齋秋懷

西陸氣初納，緒暑猶未已。雷雨感蒸薄，驚飈中夜起。草木始受傷，蟋蟀鳴不止。天道有盈虛，人事豈殊此。炎炎丞相門，今不保妻子。勢位猶區區，憑恃誠堪鄙。離朱察秋毫，盲者眩河濟。歲晏惟青松，不見桃與李。驅馬舍之去，去棲匡阜趾。

歲暮返自銅仁危途盛雪羈愁無賴幸地主方公總戎張君貺以清酒持盃賦謝

歲晏役車休，而我尚馳逐。旣慚不顧期，亦異至河復。石林未爲艱，羊腸同佶曲。霖雨更狼籍，人馬共寒縮。頗憂中夜飯，能無岐途哭。明時擯遠方，文史空果腹。老至猶事人，暮律自詒感。故人惠清醕，聊可慰幽獨。一壺比千金，短歌申

履篤

經四除夕示兒子

百年多作客，邊徼亦僑裝。屈指四除夕，猶未返故鄉。何日不懷土，觸景倍慨慷。何人不聚首，骨肉天一方。蠻中多惡戲，燈燭亦輝煌。稚兒頗穎茂，彬彬共傳觴。人世畏後生，流光安可常。我昔亦如此，轉盼鬢已蒼。顧謂當努力，相與咏大康。酒酣望牛斗，雲山何茫茫。

懷歸

喜讀人間世，未知巧宦方。嵇公七不堪，孔茂病三亡。宜乎今之人，見我謂猖狂。方鑿入圓柄，齟齬固其常。一言觸權貴，棄我如糝糠。勞人方草草，夸者采色陽。禍患非自取，墮地皆康莊。不見昔賢達，曳筇猶歌商。



重過桃源洞依淵明所紀事實作

秦人取黔中武陵亦黔地云何隱淪人來此避濁世目不  
識戰爭身靡歷驚畏居然長子孫坐閱五百歲是中桑竹  
繁亦兼草樹麗林盡水源窮紅白相照媚冥鴻豈離繳淵  
魚不驚餌寧惟無是非正復昧興廢漁者徒譏譏太守亦  
多事嗟彼區中人文繁滋情僞淳薄旣殊風壽歿亦迥異  
窈窕洞中天恬熙同老穉蕩蕩竟何終千載徒歆契

辛巳之冬余涉洞庭幾爲魚矣今歸邇道長沙從小  
湖避之至龍陽道中遙望其浩瀚黏天感作一首以  
知避爲快焉

昔我涉洞庭短晷日窮次黃雲旣黯黯陰風正淒厲肅肅  
鴉羣飛嗷嗷雁嘹唳舳舻渺一葉羈孤糞同事萬頃黑浪  
奔四望已無地滄澗螿蛟蜃荒忽闕靈異君山一盃小袋  
口萬流會震盪無和聲慘黷多戾氣壯哉總坎德滌爾包  
南裔而我浮芥舟呼吸生死繫幾爲不弔人侷與海賈類  
追思毛髮竦重嘆利名累今歸始避危鼎澗何夷易垂堂  
有深規覆井豈非智躁進乖道心尊生惟晚志况復人心  
險風波豈殊是當惜有涯身永藏濟川噐

分宜道中過故相巖公宅

七星山何峻袁螺水并流萃止鍾明德世闕宜公侯芳苑  
擅詞賦政本贊勛猷主恩不可恃人心有戈矛本謂同伊  
傅如何律斯由高平竟殞霍袁益善短周田強實乃斃懿  
密爽以收誰鑿枯魚泣孰知膠漆讐目睫良足喻浮榮真  
隱憂使我經故宅悵然感荒丘



於從姑往麻姑瞻眺

從姑邈郭門峰高徑亦窄巖下刻僧房乳泉時瀝滴束竇  
僅穿雲陰洞容枕席漸高境彌佳天橋霄漢迢遙望麻源  
山明發窈登歷雨意始蒼茫晴暉更生色霏煙結冥濛丹  
井涵純白三復謝公詩慷慨顏君石想見玉女蹤鳴佩安  
可覲洞天舊占名僊都果繫籍平生慕江海此日探靈跡  
逝委九年心欲搏萬里翼

聞兩浙運副報聊述本懷

汲黯嘆薪積方朔羨侏儒直道屢違俗襍被竟何辜業已  
終林澤存叙猶謫居老至官逾下廢久性益疏豈不甘肥  
素內顧無斗儲猿窮不擇木驥垂服鹽車徒爲衣食累將  
受繩墨拘水鄉多佳麗千里近故廬界位代躬耕薄祿供

著書餘此付度外姑以盡有餘

季冬魏秀才辟疆以詩見訪酬贈

嚴陰送暮律廣莫凜寒沍愁雲方黯黯雨雪紛庭樹慚無  
溫麗詞猥蒙英茂顧來章代編紵傾蓋忽如故平輿有二  
龍魏氏齊芳譽夔岳諸生中屢空航行素古學傷下衰遠  
韻漸訛蠹窳竈在游漠一遇猶旦暮子來歌白雪余邁披  
雲霧大業共振興綺齡可遐鶩

清秋多懷聊述

毒暑叢今夏秋深始清微薦當枯旱歲氣至威亦虧濛濛  
微雨卮嫋嫋清風吹薄寒夜方永少陰景漸淒下有寒蛩  
織上有鼯鼠啼雖欣煩燠去氣肅感憂思



秋夜何迢迢徘徊不安寢接夏盛初衰開冬氣更凜炎炎  
一退藏淒淒薄衾枕三時亦有思未若此爲甚秋心本自  
愁矧余多埴壤煩憂竟何爲對酒須當飲

三

余生忽衰老時節信如電下位久沉淪文雅世疵賤州羈  
徒勞人父老歆相見亭伯不之官孫堪卽棄縣容鬢已如  
秋離居苦悠緬何爲競春華教子無營羨

過麻城山苦寒雨

節候倂驚蟄晴陰忽不常詰旦陰霞起禺中北風狂蟄虫  
復凍閉號寒踏高岡傳聞楚祭路孔子曾棲皇華輅被文  
律龍跡有遺坊顛沛脫饑餒蒙犯歷榛荒大聖不遑處余  
何恨淒涼

寓淇縣不甚得古跡

鄴下倦羈棲淇上再僑旅停車周眺望自顧聊容與已無  
綠竹猗安見淇上女百泉美悠緬太行邇艱阻豈伊亡國  
墟春遊輒風雨雲陰黯城壕簷垂暗解宇世代何參差朝  
市爲禾黍妖臺已傾蕪仁賢亦塵土余本多悲士宦跡經  
衛魯有見乖所聞撫今多失古感往歸虛浮轉軀何自苦  
日暮鬱情條逝將棄簪組

息縣南來風恙多發述情

回車申息道風景何參錯土音襍荆蠻民俗殊汴洛漸喜  
家鄉近首夏暑猶薄荇葉泛清池苑柳蔭成幄民知勤其  
生男女服鋤耨昔往麥初長今來麥已穫我行豈不疲夙  
復亦云樂貞疾恐沉淪何爲自束縛



豫章秋懷詩示鬱儀宗侯

豫章吳楚交築城自灌嬰江介多衝風積水照煩城涼雲  
淡流火疎雨黯篝燈商聲日嫋嫋客思益煢煢介特常少  
可高視賤浮榮匡阜有真氣逍遙冀長生

二

出門復入門軒蓋絕輝光高冠切雲嵬楚楚盛衣裳彩旄  
導前驅隸卒夾兩傍容華艷朝日叱咤凜秋霜視之威赫  
赫叩之心芒芒我貧原非病彼痴豈若狂衣褐懷珠玉爲  
樂不可忘

三

一日難得鳥千蹠始窮味曖曖一家言曷足談道藝奈何  
今之入自謂道在是謂天大可圓謂海有涯際朱門有更  
生殺青總竒秘秋風湘水濱傾蓋如莊惠相望斗牛間歲  
晏可同事

夏日遊竹齋宗侯園

玉牒汎天潢淵襟標韻宇習靜欲避喧著書時閉戶純孝  
過荀何談經繹鄒魯延我長統園棲築洹之澣一丘慕謝  
鯤三逕同蔣詡夾道蔭松梧編戶織宿楚幽室閤蔦蘿離  
堂麗花塢田廬交植援勝陌喜營圃冰簟昨時清晚權環  
河渚北水貴於金盛月夕如午欲去重低徊永日聊容與  
愧我非求羊與君申縞紵

王衛輝道甫招飲四望亭索賦

有亭可四望故國此遊目陳詩次二南談古必更僕林薄  
旣氤氳山川亦迴複東距桑土野西睇泉源淥牧野何溥



長太行仍佶曲王氣亦已遠皇柯建藩服親親比文昭賢  
賢亦康叔王君抱魁能重地掄明淑擊磬懷宣尼過闕同  
伯玉延我空亭中携手望垆牧周章興懼思臨眺悲陵谷  
徵歌采棠聲劇飲壺觴續情盤興未已猶嫌夏日促嘗余  
紛務羈感君惠義篤借問銅雀臺何似淇園竹

鄴歸行路難

一官環郎署歸思逐江干歲除無休軌履端靡停轅軻發  
趙衛區道經鄭許間過蔡方入楚迤邐歷噴吭土音漸以  
異風景忽殊觀素衣易爲緇淳俗此趨頑鄉關亦何遠舉  
目羨飛翰浮榮方自恣何用起長嘆

風逆過小孤

砥柱表東南洪都資保障兀立江中央魚鼈不能上巖巖

隨噴薄巖巖巖陵蕩漾仰視摩匡衡俯度無尋丈旣過龍門  
險益簇馬當浪巨壑焉作力鴻濛巧賦像陵谷有變遷萬  
古屹無恙繫此趨王程四月陰風壯捩柁榜人勞拏杖漁  
父唱峽急鳴孤鴉雲低肅新漲何嫌白髮侵襟懷得趨曠  
年友蔡肖謙憲使招飲西湖之作

昔歲遊西湖蓮舟苦秋涸假道復來遊光景殊勝昨新水  
方渙渙綠岫何參錯明灩無風波決漭如巨壑故人携清  
樽素交申久約倒屣見真誠任達展懽謔眷深淑氣蒸魚  
鱗時泳躍草樹旣芳妍煙霞多變駁戀戀難分違棲棲偏  
塵縛舉目羨浮鷗輕軀慕遼鶴

七言古

贈張總戎於台州六日三捷



世廟晚年師不空倭奴雲擾熾溘東張公年少起行伍六  
日三捷何其雄君侯殉國秉忠義軍中賈勇爭奮臂水陸  
交攻斬首多渠魁猶復生擒致采薇一月曷稱奇臨淮營  
師變旌旗從此南方靜豺虎卽看東海曝鯨鱗旄頭一掃  
清白色牛酒壺漿相勞逆雁碭千峰瑞靄生隱隱朝霞映  
桐栢毛錐龍泉孰輕軒開國承家萬斯年血戰功勳在社  
稷建牙分閩豈偶然天涯握手披雲霧霏談樽俎遣塵慮  
雅歌猶得似祭遵癖書將無比杜預帝念黔中列荒服煩  
若臥護特推轂篁苗業已憚威名干戈載輯安樵牧卽今  
四鄙多豺狼天驕佯款實猖狂安得移君鎮重地坐銷氛  
縶縛名王

與屠長卿

白露涼風澹素秋紛紛除目下皇州我獨淪飄管斥鹵荒  
煙哀籟亂鄉愁微軀足跡遍天下晚遊勾越更清灑此中  
文物富且妍憐余遲暮才情寡讀書終日事習徒驂駟垂  
耳伏鹽車安能喪我如南郭却畀時俗盡東閭大國多材  
君振羽彼有人焉未敢侮神交逸氣邈山河心賞排雲申  
縞紵盛年解組兼迓禪觀濤窺寶懷蜚連鴻苞已聞盡玄  
史高義尤復薄雲天坐君芳苑酌君酒朗月清風疏戶牖  
興來大叫欲凌霄與君一言相不朽

贈別張幼于

秣陵秋氣清如鏡風蘭露桂流塵淨熒熒明月鑿薄帷輾  
轉踟躕心不定長安青紫稀吾徒烏紗獨馬行街衢姑蘓  
故人忽相訪驚喜傾筐誼不孤故人一別十六年那能容



鬢不蒼然憐余改容不改秩朱絲白簡常牽纏問君今年  
五十九操觚散帙不離手早聞賦詩多足傳卒以學易逾  
不朽玄言樂笑神常王秋江菊岍乘吳航呂安命駕豈愆  
期長康布帆幸無恙西曹荒邸沒蒿蓬杯長景遽聞夜鐘  
故國高秋禾黍動寒山落日煙雲空古人未得今人羣今  
人自羨古人文感此與君同意氣浮雲勢利羞無聞世情  
反覆交彌寡莫輕此會亦天假悲秋悵別若爲情向後心  
期難預寫

五言律

元旦望京有作

元會際雍熙春明述職期殊方開正朔雙闕盛威儀漂泊  
京華遠嗟此歲序移遙瞻拱北極敬誦萬年詩

衛君夫復除比部

不敢南陽卧起裝入紫宸帝鄉三載夢郎署十年人白水  
盟如故玄都花自新多君清望重名對起絲綸

送劉比部擢守廣右太平

江柳拂行裝西征別恨長舊曹平庶獄新命守遐方嶺外  
民風朴衙前山色蒼懸知報政日高益寵循良

夏日過周山人文美

言訪竹林友頻傾河朔觴風來驅毒暑雨過淨餘芳久坐  
消行潦深杯入醉鄉未須岐仕隱吾意屬高陽

秋日吳孝甫俞公臨過訪得丹字

寂寞蔣生逕逢君自盡懽天空浮漠溇月滿蔭檀欒秋晚  
花全肅霜殘葉半丹素交同嘿語良晤豈非難



哭從弟挺

薄祚常傷善先人痛歿徂今仍弱一个况乃異凡夫荒忽  
魂何在凋零類益孤惟餘莊叟意修短總歸無

贈周貴陽

陪署挹蘭芳分符出貴陽山多障白日地阻夾修篁封域  
舊荆楚雲煙接夜郎聖朝無近遠報政即循良

無梁殿納涼

石室度層雲颯然爽氣新焚香繙典笈揮麈靜囂塵無熱  
依河主離憂勝藥神浮生悲自擾欲去復逡巡

邵伯道中

不謂將垂白乘槎續舊遊征帆多北向大火漸西流積水  
河洲沒分疆禾黍秋維揚自沃土差足緩羈愁

高郵舟中值東風橫發上下兩難感家室之睽離悵  
南北之異路有作

全家俱作客異地各風煙拙宦艱難劇孤舟感慨偏離鄉  
已數載望闕尚三千旅况秋來甚回頭思惘然

晚泊望寶應湖

澄湖何浩渺練影照人明伏退秋光見簾開水氣清諸溪  
懸月色萬籟濟風聲寂寞無同賞孤吟自旅情

七月望夕泛河

乘風自樂事况復久蹉跎詩思秋來壯鄉心川上多青天  
飛白鳥皎月映黃河稍喜中原近無興勞者歌

從徐州夜泊孤村

弭棹泊河濱風煙南北分急灣崩岸見涼夜搗砧聞陰霧



時浮水暮山看入雲孤村何處宿一夕旅情紛

望野

秋令似春朝風橫細雨飄曠煙紛漠漠荒草自蕭蕭田父  
誅茅羸山童牧犢謠浮名刺促者不及一漁樵

得遷報返南

王程方計日旋軫亦奇哉客似御風返舟如盡興回重窺  
淮海勝一覽大河洄無復帝鄉願高歌歸去來

泊江口遇雨

風阻泊江潯舟行已滯滯那堪秋雨急益動故園心小澗  
通潮水荒林下夕陰孤燈何寂寞觸緒寄微吟

八月初五日風雨微濛秋江慘淡宿上新河將易舟  
焉回思乙亥初冬改南省亦遇陰雨宿此今且六年

矣宦不達而容鬢改也愀然有作

幾年依玉署此日泊江關客路更寒暑扁舟空往還雲濃  
虧白日雨暗黯青山風景如疇昔途窮鬢漸斑

舟行中秋得月

今夜中秋月故鄉猶未還一麾投阻僻兩月苦間關空有  
庾樓興其如潘鬢斑惟應謝世網學道隱深山

初入黔界

一入黔中路梅殘逼歲除空叨五馬秩竟入九彝居僻境  
通滇道分疆僅楚餘爲憐叢爾國殷后昔驅車

公安渡江卽景

明發促征車江深渡自如蘆收稀鳥雀野曠便樵漁晴日  
嚴風濟寒郊古木疏豫章多旅客曾不得家書



襄陽北來旅宿

郵舍太蕭森，羈棲百念侵。  
生煙淒獨戍，寒雀噪空林。  
夜永孤燈晦，雲低缺月沉。  
更誰同夜語，慘澹劇傷心。

過岳武穆廟

扑檜難酬恨，深悲主聽昏。  
天應棄宋室，地遂闔中原。  
古廟霜鍾肅，寒松夕鳥喧。  
殲良翻藉寇，千載更銷魂。

過真定

茲隴今馮翊，建旄護上都。  
河山雄鉅鹿，幅壤混鮮虞。  
月朗平沙映，城高寶塔孤。  
清時非四戰，流覽見鴻圖。

除夕

徂歲蠻陬客，今宵亦帝京。  
樽前想萬里，朝上欲三更。  
入爲羈愁老，春從殘臘生。  
壯年頻寓此，離合故殊情。

喜得去郡作

無望兒寬最，翻爲豎子欺。  
循良懷渤海，疑似構南箕。  
失馬寧非福，應牛豈是癡。  
樗材堪不斲，何羨棟梁爲。

二

拙宦誰能仕，孤蹤常畏譏。  
衣惟裁薜荔，夢久逐荆扉。  
深媿淵明達，粗知伯玉非。  
但求身健飯，何必嘆官微。

長沙道中

掛席雨冥濛，連天樹鬱葱。  
人迷洲渚畔，雀噪荻蘆中。  
樂土安漁牧，歸心趁水風。  
江鄉欣漸近，景物亦相同。

二

湖光四望白，九派眩行舟。  
雨暗常疑夜，風涼却似秋。  
幾年疲惡道，此地飽清流。  
本自東南勝，無因遷客愁。



寄懷劉銓部

吾愛劉思道分違歲序新春風纔入逕夜雨輒懷人閒署  
堪裁賦清時豈積薪樗材知不偶應自老垂綸

四山塘夜月有懷

月色映湖清烟波一望平流年隨逝水羈思逐懸旌拙宦  
遊初歇浮生隱未成惟欣冬氣暖草樹尚含榮

湖中寒風橫作遂動歸心

時以補郡赴京

風雲晦廣澤薄暮更生愁山帶晴陰辨江波日夜流未尋  
三隱跡翻作兩都遊回櫂猶非晚殷勤歲欲休

將結屋東園九月十六夜賞月其地

乘月東園內時維九月間草廬猶未就桂魄已相關疏竹  
凝清露寒鴻度遠山元規興不淺把酒一開顏

至常山登舟述懷

三衢初入越解纜值春深拙宦一生蹇辭家百慮侵紆金  
視舊物解薜負初心遊覽平生興未應嘆陸沉

崇德北來阻風

謫宦遊方倦陰風聲正哀斷腸惟越客舉目望蘇臺薄俗  
看榮賤虛舟信去來寫憂聊適國何用苦徘徊

舟入鄱陽望康山即事

魚鳥堪游目何如市井中青陽浮水碧野燒滿天紅神武  
山川色靈祠社稷功重來辭六載浪跡逐春鴻

酬王道甫郡伯

祖席依亭榭悵焉千里分論才誰過晉何地更逢君良夜  
樽罍欸征途霰雪紛瑤篇如不斲亦足慰離羣



五言排律

贈馮督學時可

天壤連吳越神皇宅海濶平原昔籍盛馮氏此芳綿香滿  
謝庭樹家傳王氏瓊三槐漸鼎峙駟馬輒蟬聯忼慨尊公  
疏葳蕤國史篇蘇卿心匪石李固直如弦奸佞已褫膽綱  
常賴獨肩簪纓寧乏姓忠孝罕雙傳大鳥果符瑞寶刀惟  
贈賢八龍並秀爽一鶚蚤騰騫文史三冬富芳名片玉專  
朗吟高白雪剌日理青編雅志輕拖紫精思欲草玄含香  
翔北闕鼓鐸振南天絳帳春風被蒙區化雨偏羣材歸水  
鏡疏俗盛歌絃海內文名重朝端揆席懸豈惟承閎閣直  
是賁山川下走慚垂翅孤蹤靡附權樗材宜拙用麋戀竟  
難遷蠹簡徒成癖翔遠亦孔遭避喧甘散地麾遠竄蠻煙

繞指剛腸化熏心簿領纏瑾瑜空抵鵲鐘鼓只驚鷄鷄肋  
味全短半腸路可憐穗垂猶反本鳥倦亦思旋萍水逢知  
已風雲縮夙緣賞音收鄙累忘分脫拘攣燕谷隨生爨韓  
灰頓欲然懷誠聊述德深用志當年

七言律

重陽

羈懷何日不思鄉九日重逢倍慨慷歲閏早催霜落水天  
高時見雁成行無媒薄宦空頭白有酒開襟對菊黃強欲  
登高難獨往江城暮笛正淒涼

酬喻邦相蘭谿

江天春凍雨如絲尺素遙將慰所思我自孤踪塵榻久君  
因直道賜環遲路迷水國空餘夢花浦河陽數寄詩同病



總憐疎宦術湖亭栗里正逶迤

過彭城

州從禹貢稱西楚此日重來感慨新黃浪排空常黯晦蒼  
山遶郭並嶙峋三分霸業隨流水八景遊情隔暮津舊是  
戰場兼積潦荒煙落日慘羈人

上新河望金陵

建業前遊空復過瞻依城闕面嵯峨青山一屐滄洲近彩  
筆十年南國多習慣幾疑忘巨麗別來頻夢遶煙蘿爲郎  
留滯投荒服江上徘徊思若何

過九江

滔滔逝水罄朝昏見說潯陽九派分月照寒波搖素練山  
連極浦接黃雲東南形勝貔貅集吳楚蒼茫雁鶩紛江漢

遠遊今發跡愁心更謁洞庭君

洞庭遇雨

洞庭陰雨倍傷心水宿淹時嘆滯淫苗地難逢中土使漁  
舟滿聽故鄉音荒煙百里腥臊聚野戍三洲草蒿深極目  
蠻呷猶阻遯武陵風物已蕭森

舟遊武陵夜望北斗失所感作

始信武陵谿谷深窮冬竹樹並垂陰波臣無賴成孤憤漁  
父哀歌動客心湖淨水清浮白鳥沙明日落戲文禽江山  
迢遞星辰改極目家鄉不可尋

鄴下懷古

太行漳水自縈迴魏國山河亦壯哉露冷陵松遊鹿豕風  
淒輦道沒蒿萊四封舊是殷畿地千載誰當鄴下才王氣



久銷人去遠暮雲霜笛總堪哀

再經武陵源道

一麾何意蒞荒蠻隱地扁舟數往還舉目已殊三楚景開  
簾苦逼萬重山朝嵐蒸雨春光黯宿霧浮川水勢潏遠役  
惟欣家室聚臨流酌酒且開顏

宿銅仁堪黃舖

層陰萬里嶺巒重蓬篚荒榛鳥道通木末秋聲號野獸燈  
前夜雨織寒蟲行吟自嘆孤踪遠爽籟翻驚絕域同叢爾  
苗人無負固車書久已混華風

銑男歸難爲別也復作一首

憶爾來思喜氣濃離愁轉盼又相逢霜天木落寒砧急鳥  
道山深宿霧重選日心驚期漸迫遙程日送寂無踪年年

悵別微名累恨不同歸伴菊松

觀音寺習儀

分符三載歷開關清夜鳴珂儼聖顏萬里心旌懸北極中  
秋月色落西山金河雁斷鄉書杳玉署星移旅鬢斑理罷  
禪宮無住着端居時覺道心還

秋分連雨述懷

畏景常欣秋候至秋深蕭瑟又堪傷楚山落木初悲客巫  
峽啼猿正斷腸土鼓迎寒蟲織苦金風嘯律雁飛忙那堪  
寂寞荒齋裏雨滴梧桐夜未央

仲夏初同黃仕楨僉憲擬峴臺用尤韻

蔣秀蒲青竹樹稠跨城表裏半林丘雄風拂檻歌朱鷺積  
水當窻對白鷗此地帆檣通北極何人詞賦重南州年來



吾道歸江海憔悴惟欣避隱儔

二

古榭憑高盡遠眸新堤蜿蜒夾雙流江山遙對羊公石煙  
雨連霏帝子樓盡日雲霞多變態異時碑碣恨前修山陰  
訪戴今殊遠有客能來感氣求

送顧叔時銓部左遷

啓事僊曹此逐臣懸瓌不御反爲珍成名蚤已空羣駿去  
國原因受逆鱗楚客羈懷憑弔古湘江秋色正愁人南金  
價重慚非偶傾蓋能殊白首新

送曾景默觀察南楚

璽書新沐過江鄉趣駕星潭草樹芳鈴閣銷兵看舞鶴  
車肅部聽神羊風高雁字衡陽渡日落湘魂楚水傍作賦

定知懷岳買年來當有和投章

贈陳副察起蜀

除書歲晏下江干叱馭寧歌行路難蜀野星明占使節錦  
江花滿簇金鞍安危經畧非憑險鄉國詩情在倚闌十載  
山棲年尚少重瞻繡斧一彈冠

張郡丞陳司理邀飲越望臺作

符分故國枕臺崇踏磴捫蘿有路通雲樹遙連滄海外山  
川併入翠亭中流風邈邈微虞對芳草萋萋自越宮逸興  
未消難繫日羨君吏隱得相同

仲秋十四日邵比部邀飲同長卿儀部

金陵一別鬢皤然同病蕭條祗自憐浪跡忽驚雙劍合師  
厨那費百金筵塵中偏側消浮白坐上縱橫各草玄闌夜



清歌殊未已涼階月色正流天

沈官詹荷吾應名喜賦併勸駕焉

三公一日待晨昏忽奉徵書下帝闈北斗文章標館閣東  
山譽望在乾坤春融僊權魚龍躍日麗皇州草樹繁最是  
虛襟能薦士綉袍欲借故人溫

二

三朝供奉最詞臣歸臥江山簡命新豈着鹿皮爲捷徑欲  
因龍衮貯經綸河梁送別紛冠蓋帝闕來章覩鳳麟聞道  
高堂方健飯應將報主作寧親

三

僊槎顧望思依依側席崇英士論歸青鬢山中尋服食皇  
華驛路儼駢駢聖朝旌孝加藜杖遊子趨朝戀綵衣和鼎

吹塵應有待扳輿色養事何違

呂公子薜荔園

紉綺名園相國家超然被薜謝紛華時因問寢聽晨鳥不  
倦遊山戀晚霞春雨含香侵蠟屐秋風帶月到寒花迂疎  
得醉蘭臺曲公子西園興復賒

奉趙漈陽少宰

曾爲綱常建讜言天池漈水自飛翻龍樓斗揭高東省鷄  
樹雲深領北門四海人倫歸水鏡三台物色正乾坤朝廷  
寗直山公啓可得先噓黍谷溫

寄謝陳虞部志寰

豫章材向楚中遙江海相逢意欲消政暇僊曹多秘籍才  
高郢曲自孤標緝經白日塵心盡倚杖青山逸思饒流寓



清歌殊未已涼階月色正流天

沈官詹有吾應名喜賦併勸駕焉

三公一日侍晨昏忽奉徵書下帝闈北斗文章標館閣東  
山譽望在乾坤春融僊權魚龍躍日麗皇州草樹繁最是  
虛襟能薦士綈袍欲借故人溫

二

三朝供奉最詞臣歸臥江山簡命新豈着鹿皮爲捷徑欲  
因龍衣貯經綸河梁送別紛冠蓋帝闕來章覩鳳麟聞道  
高堂方健飯應將報主作寧親

三

僊槎顧望思依依側席崇英士論歸青鬢山中尋服食皇  
華驛路儼駢駢聖朝旌孝加藜杖遊子趨朝戀綈衣和鼎

吹塵應有待板輿色養事何違

呂公子薛荔園

紉綺名園相國家超然被薜謝紛華時因問寢聽晨鳥不  
倦遊山戀晚霞春雨含香侵蠟屐秋風帶月到寒花迂疎  
得醉蘭臺曲公子西園興復賒

奉趙漈陽少宰

曾爲綱常建讜言天池漈水自飛翻龍樓斗揭高東省鷄  
樹雲深領北門四海人倫歸水鏡三台物色正乾坤朝廷  
崑直山公啓可得先噓黍谷溫

寄謝陳虞部志寰

豫章材向楚中遙江海相逢意欲消政暇僊曹多秘籍才  
高郢曲自孤標緡經白日塵心盡倚杖青山逸思饒流寓



游蒙賓榻下別情無計駐歸輅

潯陽渡江風利感往

晨發潯陽滿棹歌亂流掛席渺煙波東風飄忽千帆出霧  
雨冥濛獨鳥過吳楚連江分上下中原極目限山河賦歸  
未就重經險追憶前遊感慨多

赤壁簡楊刺史

煙雲曠蕩遠幽宮倚檻流觀大國風積水連天春嶂綠夕  
陽照壁半江紅懷鄉每觸登臨起嘆逝翻悲戰伐空明府  
張筵逢霽月訟庭無事攬輝同

喜義仍祠部奏彈權貴謫尉雷陽

閒署憂時不顧身高官廡仕媿何人弘詞早已標芳苑直  
疏頻能批逆鱗海鶴秋風仍傲客嶺猿夜雨伴孤臣知君

逸氣凌梅尉謫籍終當洽隱淪

贈劉郡伯由岳陽故里入覲

五馬朱轡古剌侯美八爲政自風流褰帷久慰羣黎望捧  
日何辭萬里遊湖上煙波重倚閣雲間簪烏拱垂旒北征  
賦就迎歸旆更爲蒼生建遠猷

贈蕭祥符重望行取

六年簡名竄關心每過河陽待息陰片玉由來稱得士孤  
臣原自屬知音星輝雲漢秋聲肅月照棠梨爽氣深廊廟  
求才多事日知君謔諤未浮沉

汴城公署

舊遊何意數驅馳光景依然客髮衰日暮凄風吹濁浪城  
陰戰地值清時空庭生草孤燈暗獨樹侵階下葉悲緋葢



朱輪徒炫赫無媒驟欲嘆支離

重陽襟懷

爽節風高露未霜太行無限鬱蒼蒼官仍尚白書盈笥酒  
欲掄清菊滿堂四序此時收淑景千金無計繫秋光年來  
吾道深陽九可得逍遙化日長

重陽堤上大風

萬山搖落重陽節流寓心驚仕路難故國繁華悲代謝江  
天緬邈漲波瀾秋曹秩冷兼同景北渚風高自蚤寒望子  
盱衡曾不至年年悵別絆微官

臺城懷古

梁主開基幾劫灰經過詞客重徘徊青山盡擁藏經閣黃  
屋俱爲說法臺自損金甌延醜孽可憐衰甲向城隈蕭蕭

宮闕成場圃千載江南賦極哀

金陵懷古

六代繁華安在哉誰能此地不嗔盃春風拂樹花仍笑夜  
月滿江潮自來王氣北歸翻寂寞詞人南國極懽哀年來  
正爲青山戀去住悠悠白髮催

七言絕

清涼寺

水殿泠泠歌管餘千秋已作梵王居後庭花謝燕脂冷猶  
自涼風薄綺疏

送周元孚

江上欣傳桂權過板留無計聽離歌卽知聖代收文藻莫  
學騷人怨恨多



喜新治小室

晚歲新成一畝宮門迎盛月面霧峯容堂諷誦高窓臥尚  
欲山居學老農





